

Platt partu:

Rundbreef 2023-03

Dat weer de Vagel Tietvörbi.
Ik heff em woll verstahn,
süng ok dat Leed von di un mi,
van Kamen un Vergahn.

[Hans Ehrke](#)

Moinmoin, leve plattdüütsche Maten un Frünnen!

Hüüt keen Schüddelriemel, un dat Vagelleed baven begrööt ok nich bloots den Lent: Uns Maat Willi Höfig is op de grote Reis gahn. Dat [Herrchen vun Frieda](#), de Herr [vun de Muuskist](#) -- de in Wohrheit ut en Privaatbibliothek mit meist 17.000 Böker besteiht. Den Vers baven hett he in een vun sien Muuskist-Bidrääg vörstellt. Sien egen letzte Böker sünd in mienen lütten Verlag rutkamen -- dorünner [Dat anner Düütsch](#) (sien letzt Book as Rutgever) un uns [Renshi](#). He blifft wisslich unvergeten in de nedderdüütsche Literatur.

Tja, de Februar is mit sien 28 Daag ja en sporsamen Maand, un wi hebbt dütmaal ok nich so veel rutbröcht as sünst. Liekers weer veel los -- dat [gresig Eerdbevern](#) in Nahoost, [dör Missweertschap so döödlich](#) maakt; een Johr Krieg in Europa, [de uns de Wöör versleit, uns raadlos maakt. Wosaken sünd wi dor henkamen?](#) De [Passion fangt an](#); düt Johr geiht Gertrud Everding mit Andachten düssen schönen, ernststen Weg mit uns. De Weg föhrt ok vun'n [Winter mit den letzten Snee](#) un sogor [Ies in Erika Fischers Kalennerblatt](#) hen na'n Lent mit de [eersten Goornarbeiten](#). De hett uns en niege Stimm schickt, Karl-Otto Dohrendorf, över de wi uns freit. Noch en anner Stimm is nieg: Michael Neiss sien. He smitt en [launigen lütten Online-Plattkrink](#), 'neem ik ok gern dorbibün, un he wull dat mal op Plattpartu künnig maken. Truut Se sik un kiekt rin! Villicht seht wi uns dor.

As elkeen Maand hebbt wi ok wedder Vertellsels dorbi -- [skandalöse ut lang verleden Tieden, romantische Geschichten](#) un ok [horrible ut nich ganz so lang verleden Tieden](#) un [ernstere ut heel aktuelle Tieden](#). Behrend Böckmann [dröömt nich bloots vun uns Mudderspraak](#), sünnern vertellt uns ok in en niege Mini-Reeg vun Engels in [sien egen Beleven](#) un [in de Populärkultur](#). Mehr Engels warrt noch rinfladdern.

Un kiek, wat is bi allens düt so dörflutscht? De [Natuur](#) is düssen Maand bi uns ganz achteröver fulln!! Keen Bidrag. Wenn Se dat gern ännern wüllt, mailt Se uns Ehr Bidrääg, Beobachten un Begeistern för de Natuur! Wi freit uns över elk niegen Maat!

Wenn wi uns nu wedderleest, is dat al April. Un wenn Se denn de Frühlingsgefühle överfallt, denn merkt Se sik:

De verleeften Lakenmaten
muttst du eenfach maken laten!

Kiek, un nu hebbt wi doch noch en Schüddelriemel hatt! Wöör ja ok nich angahn :-)
Also Adjüs un Arrivederci bet in'n Oostermaand!

Nu de Linkliste. Op de Links bruukt Se bloots klicken, dat Se henkaamt.

Plattdüütsch Künst:

[Wöör in'n Krieg](#). Vun Karl-Heinz Groth (25.2.)
[Notizen ut'n Heumaand](#). Fotos un Verse vun Marlou Lessing (19.2.)
[Moin to uns digitalen Plattdüütschkrink!](#) Vun Michael Neiss (19.2.)
[Kalenner 2023: Februar -- Hornung](#). Vun Erika Fischer (5.2.)

De Welt un Gott:

[Passion: Sünndag Invocavit](#). Vun Gertrud Everding (26.2.)
[Dei beste Fründ ward dei gröttste Fiend](#). Vun Behrend Böckmann (25.2.)
[Dat Gitter](#). Vun Berthold Cordes (25.2.)
[Engels in uns Läben: För wat Engels herhollen möten](#). Vun Behrend Böckmann (19.2.)
[Dat Malöör mit de "Goldemmer"](#). Vun Klaus-Dieter Tüxen (19.2.)
[Horst Wernecke vertellt: Goethes "Faust" tweemool trechböög](#) (12.2.)
[Fiete Lüttenhus: Bi Sogebiel](#). Vun Friedrich Schnoor (7.2.)
[Garnarbeit](#). Vun Karl-Otto Dohrendorf (7.2.)
[Engels in uns Läben: Mien iersten Begägnungen mit Engels](#). Vun Behrend Böckmann (5.2.)

In't [Lütte Gebedbauk](#):

[Liekers leven. Syrien](#). Vun Marlou Lessing (10.2.)

Wat in de Welt vörgeiht:

[Dat anatolisch Bäwen](#). Vun Behrend Böckmann (28.2.)
[Drömen von uns Mudderspråk Platt, taun Mudderspråkendach 2023](#). Vun Behrend Böckmann (21.2.)
[Dat niege Geld](#). Vun Behrend Böckmann (12.2.)

In't [plattdüütsche Notizbook](#) vun Marlou Lessing:

[Orwell lett gröten](#) (28.2.)
[Raadlos](#) (19.2.)
[Överhaalspoor](#) (10.2.)

För Kinner:

Modder Sünn ehr Kinner: Mutti, Mutti, dat sniet! Märken vun Sophie Reinheimer,
överdragen vun Klaus-Dieter Tüxen (5.2.)

Hartlich grööt

Marlou Lessing un dat lütte Plattpartu-Team